

早令得辦。莫使淹遲，宜速疾作。

《根本薩婆多部》云：假令登定，暫得無憂，不能斷煩惱。若見諦理，煩惱斷除。

《盤山語錄》：修行人大忌：說人長短是非，乃至一切世事非干己者。口不可說，心不可思。但口說心思，便是昧了自己。若專鍊心，常搜己過，那得工夫管他家屋裡事？粉骨碎身，唯心莫動。收拾自心如一尊木雕聖像，坐在堂中，終日無人，亦如此！旛蓋簇擁，香花供養，亦如此！讚歎亦如此！謗毀亦如此！修行人常常心上無事，時時刻刻體究自己本命元辰端的處。

古德云：真正辦道人，無翦爪之工。又云：暫時不在，猶如死人。

《中峰警策歌》云：行也做，坐也做，尺寸光陰休放過。

趙清獻公藥欄壞不修，人問之？曰：安可以此事動吾一念乎？

## 雜記解惑之訓

經云：禪有極妙內樂，眾生捨之而求外；不得內心之離欲，而於色欲中求

樂。

諸天有七寶自娛，後墮沸屎地獄。人中多聞，世智辨聰，後墮豬羊禽獸之類，無所別知。

眾生無恩於菩薩，而菩薩常欲利益眾生。眾生奪菩薩命，割截身體；而菩薩以第一佛樂慧命與諸眾生。

諸欲難可解，何以能釋之？觀身得實相，則不為所轉。《智論》云：「實相者，所謂畢竟空。」